

本朝分省人物考

人物考目錄卷之一百十二

廣東惠州府

王度

李顥

張津

陳吾德

葉夢熊

楊起元

陳駿

葉應

曾祿

姚祥

車邦佑

唐勳

王天與

曾守約

翟宗魯

葉春及

李學一

謝憲

附李學彥

潮州府

戴瑀

吳裕

黃勳

附子一道

翁萬達

章熙

薛侃

蕭鼎

林祖

蘇福

補遺

林興祖

林希蔭

蕭鑾

李齡

吳一貫

王昂

莊璵

鄭一初

劉子興

林大欽

陳一松

陳瑞龍

鄭旻

唐伯元

薛宗鑑

瓊州府

葉禎

唐舟

附子亮

邢宥

薛遠

丘濬

王佐

唐 胄

陳 實

鍾 芳

海 瑞

鄭廷鵠

王懋德

丘 敦

曾 鵬

林士元

吳會期

黃 顯

黃宏宇

附弟宏憲

肇慶府

梁 敏

梁 軫

陳 鼎

梁致育

劉 芳

附子茲

盧宅仁

莫如士

李津

南雄府

陳德文

譚大初

韶州府

黃裳

鄧頤

廉州府

林榮

高州府

姚岳祥

本朝京省人物考卷之二百十二

廣東

惠州府  
瓊州府

潮州府  
肇慶府

王 度

王度字子中惠州府歸善人肆力經籍研理修詞部使者以明經薦起家拜監察御史繩糾務持大體疏十餘上多見用 高帝升遐諸藩不靖兵部齊泰等會議軍事度與僉謀監庚辰會試翕然稱得人時曹國公李景隆北征敗績退保濟南以歷城侯盛庸代之度密輸籌策隨機制勝乃有東昌之捷景隆徵還赦不誅且當軸用事忌庸等功多掩已反行讒間度

等皆見踈夏六月濟寧告急將士率吳奕避敵度請募兵益戰乃有小河之捷夏五月鳳陽不守北騎長驅方孝孺與度等畫策誓死社稷秋坐黨禍謫戍賀縣後被族誅度死時年四十有七

李 顥

李顥字思誠惠州博羅縣人正統丙辰進士由刑部主事擢福建按察司僉事未幾陞叅政綜理海道景泰丙子調任山東天順戊寅進右布政庚辰入覲時天下官旌異者僅十人而顥預焉賜宴于禮部兼錫金織襲衣轉左布政丁父憂改浙江成化丙戌召爲



工部右侍郎錢塘江溢衝嚙堤岸壞民田廬往治之  
人賴以安還朝年六十有二以疾乞歸成化十六年  
六月卒計聞賜祭葬如例顓廉靜寡慾不事聲名歷  
官中外皆著政績爲時所稱其在閩莆民有游益綱  
者仗中官勢爲鄉里大害無敢誰何之者顓至立置  
於法至今閩人稱頌不置云

張津

張津字廣漢惠州博羅縣人成化丁未進士令建陽  
遏礦盜創縣城舉荒政除女妖置田以祀五賢俾其  
後領之治迹甚著以憂去後補大冶擢監察御史疏

講學慎令等四事正德二年出知泉州時逆瑾扇燄鎮舶私人絡繹下郡邑津以嚴重鎮之輒屏息以去政平而信吏牘無欺民訟無所誕者強戢弱安郡方仰見政化之成僅三閱月竟以逆瑾排去去之日百姓送者塞道且祝焉五年瑾敗補寧波府尋陞山東左叅政八月陞南院右僉都御史兼管操江九年命征賊寇十年陞都察院右副都御史巡撫應天等府上言江南水旱宜停止織造寬卹民力不報以征湖州孝豐賊有功遷戶部右侍郎兼左僉都御史巡撫如故未久卒于官贈南京戶部尚書賜祭葬津歷官

清謹練達吏事而自守嚴正故所至有聲望云

一 陳吾德

陳吾德字懋修惠州人嘉靖乙丑進士授行人冊封蜀府及營豐城李尚書瑩皆無私交隆慶己巳進工科給事中時東粵盜賊如蝟咸執空文以罔朝廷自督府上下相遁盜賊日多疏上八事明賞罰復兵防議舟師禁闌出補假貸覈虛冒慎撫勦郵忠勞上從之庚午元旦日食鼓于禮部僕御亂行無禮雜沓喧逐大臣自攜茵褥肆然安坐德奏非敬天之怒無敢戲豫之意且元夕月復食矣日月交食天威孔赫

陛下宜居法宮戒荒寧罷游宴凡娛耳目悅心意一切無益勿復爲之以迓天休于是勅下禮部救日月食無得喧騰自此始遣中貴織衣浙江上言民力已竭加之水旱莫若令有司如期徵解攝戶科適有買珠之命與同官李紀功切諫忤旨皆免爲庶人萬曆改元復召爲兵科給事中至京卽劾中貴人鄭貞傳內旨官其姪錦衣并總督劉燾奸賊不宜召用時江陵專言事者多承風先白乃敢言德以給諫非宰相私人獨不附禮部主事宋儒與兵曹熊敦朴交惡購敦朴欲疏江陵與王篆江陵遂令部尚書譚論劾

敦朴謫外德因並劾儒江陵嗔其不白已憾之成國  
公朱希忠薨行金錢求贈爲王復上疏力爭不可江  
陵大怒明年二月而一麾出守矣至饒正風俗作人  
才廣厲學官置旣士之田談經校藝立父老正二爲  
條教頒行民間勸以爲善去惡其善惡皆有籍行之  
出于至誠禁溺女減網罟之徵定湖港之稅革浮羨  
遠貨利宗室負勢驕奢難繩以法懼德之嚴正皆杜  
門斂手卽吹笙度曲惟恐明府聞也樂浮德安多山  
亡命潛匿番餘則濱彭蠡接九江上流不逞之徒與  
濤出沒萬年尤盜淵藪於是飭什伍鼓勇銳有警掌

固扞諸岸戈船扞諸江三年而盜皆遠去江陵以前憾未釋嗾言官劾以違禁講學擅用庫金指買學田降馬邑典史已竟削籍癸未江陵死起用推官以親老不赴後丁內外艱服除詔起同知紹興至則歲稔奸民並興爲盜職主詰盜殲渠魁二人而撫其饑者郡中清遷湖廣僉憲分部武昌巨寇劉汝國虞孟新倡亂久率師詣壘擐甲督戰二賊就擒餘奔遁上功幕府自黃州行部歸武昌遘疾二日卒年六十有二德忠誠天植正直不阿始罷歸羣盜充斥邑西梁村雲鄉二壘反爲賊窟白骨蔽野請材官鄧子龍屯守

復臨江之戍至今賴焉邑士以科第少謀徙學曰無  
改作爲也建文昌閣於左而引紫水入泮池科第自  
此盛邑負山環海內狹外寬亟言于當道築其外郭  
若白沙先生祠若節婦烈女祠並新之事關利害名  
教爲之不啻饑渴些窳侈靡佚游酣溺雖里人必正  
色誠之人亦不敢不從也

葉夢熊

葉夢熊字男兆號龍潭歸善人嘉靖乙丑進士令福  
清以廉能卓異徵拜監察御史居臺三月會議俺答  
封貢事件旨諭節陽丞二年量移歸德推官遷南

戶部主事督理鳳陽倉裁羨額絕侵漁歲省數萬轉  
郎中出守贛州府郡有巨盜葉楷葉柱聚黨安遠山  
中前守不能制乃密購楷柱所厚善者令召楷黨推  
赤厚待之令入巢穴中間離其衆楷腹心內潰不知  
也急帥兵深入以擊之楷衆倒戈內向遂馘斬楷柱  
禽其餘黨就其地設長寧縣治百姓就所在祠祀焉  
丁內艱歸苦茨中猶計擒楷黨賴玉讚致之軍門闔  
境晏然疏聞詔賜金幣服除補安慶府歲大旱禱雨  
百姓建留雲亭以志德又計縛潛邑天堂巨寇上最  
荷璽書旌異陞雲南副使未上改浙江海道尋以邊



才調永平兵備其治兵善用間又能因敵間爲我用  
復以間用間輾轉于不窮之算所制輕車神礮尤精  
一試遼東虜咸披靡當事者上聞下其式于九邊仍  
溫旨慰勞加叅政適鄰部士卒鼓譟丙夜馳定之咸  
受約束無敢譁者大計舉廉能第一尋晉山東按察  
使晉右轄擢右僉都御史巡撫貴州兼督川東湖北  
節制三省草坪苗殺一千戶倡亂立策殲其首惡故  
事按撫以幣交皆取償公費獨命典謁司之互易其  
幣以報擢副都御史撫甘肅寧夏哮拜哮承恩劉東  
陽自恃家丁強衆又虜方黠悍而邊備單弱遂決計

勾虜叛逆戕撫臣脅宗室虐焰張甚得旨趨寧夏  
入靈州虜數萬突至亟命驍將麻貴等出其不意破  
之虜復傳城下率兵搏戰虜宵遁賊失援喪膽然猶  
堅壁以拒我師朝廷憤師久無功下封侯之賞賜上  
方劔速總督魏而以夢熊代其任俾得專決乃召將  
士激勸之示之劔人人競奮決水灌城復用神礮焚  
其樓櫓擊破卜着二虜酋之援賊者賊意氣沮喪益  
耀舟師震賊而間移蠟書以移其黨俾爲內應百道  
攻擊承恩等計無所出斬劉東陽等三人函首行成  
不聽益進兵攻之哮拜自焚死承恩傳首九邊捷上

擢右都御史廕一子錦衣世襲正千戶尋舉邊功陞  
兵部尚書復廕一子胄監未幾疏乞骸骨致仕以歸

### 楊起元

楊起元字貞復別號復所惠州府歸善縣人甫弱冠  
賊躡東平焚民舍元爲所掠第賦詩自若賊異而釋  
之明歲中鄉試第一人年二十一耳三試南宮不售  
乃遊金陵下帷績學邂逅盱江黎允儒歡然相得也  
黎爲近谿羅先生之甥爲述先生言行甚悉大契于  
中業駸駸嚮往之矣丁丑舉進士改庶吉士己卯授  
翰林院編脩兩戌分校禮闈是歲冊封崇藩歸省覲

還朝取道盱江執贄羅先生而稟學焉往復叅證因  
大悟性命之宗曰乃今如客得歸矣因次先生會語  
爲答問集又摘其論爲仁者爲識仁編日諷誦之并  
示學者丁亥進脩撰戊子校士八閩試策大發所學  
同志者爭傳誦不置己丑復分校禮闈三月遷國子  
監司業辛卯晉司經局洗馬纂修 玉牒克經筵講  
官上崇聖志勤聖學疏語壬辰復分校禮闈先後所  
得多名士聞父喪奔還服闋起國子監祭酒丙申晉  
南京禮部右侍郎修 皇陵功成 上命祭告至中  
都士大夫暨師生來問學卽中庸首章與牛山之木

一章刻其旨意反覆開論中多興起者丁酉秋因災  
異復上恭勸勤學疏踰月輯高皇帝御製集刻行之  
于其中稍爲詮注取洪範語名曰訓行錄擬上未果  
遷南吏部戊戌召爲吏部右侍郎兼侍讀學士未行  
而母夫人卒于官舍扶襯還里己亥八月營葬事躬  
荷畚鍤哀毀之餘感寒疾以是月十九日卒年五十  
有三平生事親孝與弟友厚宗族閭黨其春風和氣  
不減明道程子人有過耳不欲聞而惟就其所善獎  
成之僮僕有過亦不加鞭扑微以意諭戒之而已一  
聞羅先生之學銘心刻骨無須臾忘雕一小像出必

告反必面歲時約同志祭奠于所居以爲常四方之  
士受學者屢常滿戶外隨機指授人人躍然意滿去  
持論以明德親民止至善爲宗而要歸于孝弟慈讓  
孩提不學不慮之良心卽聖人之不思不勉耳目手  
足之生生卽心愚夫愚婦之知能卽聖氣稟物欲皆  
明德之寄寓共覩共聞卽不覩不聞之本體大抵皆  
本父師之言而推衍之聞者始而疑中而譁以辯久  
之羣然服者以其言取成于心非世儒矯強義襲半  
塗而廢者比也所著有證學編楊子學解論學存笥  
稿楊子格言楊子政序輯白沙語錄證道書行于世

陳駿補

陳駿字仲良河源人永樂中以鄉薦歷官廣西柳州府知府時馬平宜山寇起駿甫抵郡寇猝至圍城人情洶洶駿從容榜投城下示以恩威禍福且令自新寇大慙怖乃狀白其情而退駿遂躬歷各壘開誠諭之皆投戈解去歲饑流移滿野駿倡屬勸分計口賑之全活甚眾城池學校靡不修葺嘗同叅將孫琦驗征剿功故事惟投首級駿必欲俘之以訊琦不以爲然旣而琦遣卒張鬚者出謀逾期不復俄獻功者至閱之得鬚者始悔服卒用駿言

葉應

葉應字子唯歸善人性敦慤謹言詞有長者風嘗獲遺金于野訪其主而歸之蔬食布衣澹如也登成化戊戌進士初授行人遷南京工部員外郎始至辭常例金清理江北諸州課額定搬運抽分之格上下便之爲營繕郎中時有民陳忠者坐逋官稅獄斃復繫其子乃鬻其已受聘女應聞而釋之代償其逋且令歸女于原聘家出守慶遠未幾乞休杜跡田野比卒無以爲斂友人副使姚祥經紀其事應好讀書老彌篤所著有易卦圖衍太極圖說大學綱領圖



曾祿

曾祿字汝學博羅人以進士宰武義邑多虛稅祿因請度田以羨補不足築隅都堰瀆潴水溉田百餘頃募兵設策擒劇賊張念四俘其黨民獲寧居召爲雲南道監察御史上疏條陳八事曰正心術慎幾微辨邪正戒權倖任賢臣納忠諫絕女寵明賞罰 孝宗多采納焉出按貴州閩蜀務存大體不事苛察蜀嘉定峨眉饒於竹木民利之而官是地者往往假川江之徵以害民祿曰食君之祿奪民之利是不可長也乃取其尤一人罪之諸屬悚怖自是無復私賦陞浙

江按察副使卒

姚祥

姚祥字應龍歸善人成化十七年進士授知沛縣廉介嚴明百廢具舉以治最徵拜江西道御史會逆瑾竊權縉紳荼毒祥每疏奏輒微及之瑾啣之甚出爲雲南副使奉諱歸復除湖廣瑾矯旨逮至京下錦衣獄未幾瑾敗起補雲南副使累陞四川按察司使卒于官

車邦佑

車邦佑字翊卿博羅人進士由行人選浙江道御史

督理屯馬 肅宗朝都御史曾銑決志復河套幾有成緒嵩父子與仇鸞比而嫉之論棄市邦佑義憤所激申救甚切忤 旨廷杖旋卒

唐 勲

唐勲字汝立歸善人正德戊辰進士授靖江知縣平賊息訟弭盜興學崇墉濬渠政聲赫然改知休寧正德癸酉饒寇逼休寧出死力禦之既散復聚時適報陞去聞之亟還率壯士與賊遇于黃茅奮擊幾盡南畿列郡倚爲長城立祠祀之紀功使上其事徵爲河南道御史未幾乞養親終起補陝西道御史巡視蘇

松鹽屯屢疏留都倉場屯田及官戚賜予差遣諸事  
上多采用焉素多病乞歸治疾卒

### 王天與

王天與字性之興寧人正德甲戌進士知寧都縣廉  
平民戴之如父母新學宮重民事鋤強梗植善良卓  
有異蹟丁丑從都御史王守仁征橫水桶岡泃頭諸  
寨屢有功陞俸二級己卯宸濠之變守仁徵郡邑兵  
天與以兵從軍中冒暑疾作歿于南昌守仁哭之哀  
解衣爲斂寧都之人立祠祀焉明年論平賊功有詔  
給賞恤其家

曾守約

曾守約字子如歸善人嘉靖己丑進士授行人選江西道御史巡視十庫刷卷江西後按廣西振紀綱擊賊吏恣肆者皆按寘于法戊戌山陝大工起武定侯郭勛總其事郡璫附之守約嘗巡視忤勛怒其不附已疏守約稽誤守約遂條奏勛欺縱不法數大罪語多切直疏留中庚子陞大理寺右寺丞未幾懇疏乞終母養時年四十有六居九年卒

翟宗魯

翟宗魯字一東博羅竹障人少補縣博士弟子學師

聖賢居處必敬重遵古禮嘗設科以誘進多士一時  
學者遵教惟謹時延慶招提時泮宮東宗魯上書督  
學使者魏校曰泮宮厭於招提據高臨下雨集以學  
爲壑非所以息邪反經崇儒貞教也徙招提登高鎮  
以其地廣學宮便校從之僧赴闕訟使者推問卒  
直宗魯當是時校講學嶺南檄下邑弟子良者受業  
宗魯從校居之省心亭一日過問省心之義對曰聞  
省心矣不聞省心心一也省心無乃二乎校嘿然其  
定力卓識皆此類也後歐陽鐸來督學檄諸博士行  
僞而堅言僞而辨者悉以名聞博士徐甲憚宗魯嚴

則以名應宗魯于是上書請削籍去鐸疑之廉得其情強起試遂中式時嘉靖辛卯年也甲辰署宣平學諭本其教於鄉者行之文士彬彬嚮風嘗著學政上督學孔天胤報曰不帥教者先斥後聞其重如此丙午聘典蜀試已酉遷融縣令緩征輸節財用廣厲學官復廢學地租每日炳蕭告天而後聽訟片言立剖胥吏受成而已久旱露禱雨乃大澍十二峒徭來寇宗魯率師禦諸郊賊以牛前行忽震死懼而退宗魯遂釋兵詣壘諭以禍福頓首請爲編氓其後兩院以轉饟非宗魯不可中道賊百艘遮迎謀知融縣亦頓

首投戈而退於是宗魯推擇諸徭子弟稍慧者被之青衿鉦鼓導歸諸徭以爲寵剽掠用稀二府嘆曰得一賢令勝百萬師信哉宗魯一介不取予事上盡禮至爭當否則諤諤不撓上官求砥對曰非融產也命征易之則曰取諸民不勝取諸官不敢憾之然率未有中也藩司以獻程不及逮簿往宗魯謝簿無罪罪乃在令然賊未誅致剽民田損國賦亦典兵罪耳藩司嘿然良久曰君且休矣而御史朱有孚則齟齬之甚有孚行部臨况縉紳宗魯不候門大怒乃遂文致有明年大計羣吏諸司皆署上考其毀不行旣觀



遂乞骸骨歸宗魯剛毅有守爵祿不入其心甘貧窶  
自家食至服官藜藿不厭敝緼不完以此終其身卒  
年七十有四

葉春及

葉春及字化甫歸善人少儻不羣領嘉靖壬子鄉  
薦三試南宮不第隆慶初授福清教諭未赴伏闕上  
書論時政一曰端治本二曰正士習三曰糾官邪四  
曰安民生五曰足國用其目二十有五縷縷三萬餘  
言都下翕然謂劉蕢復出之福清先孝弟忠信所執  
持卽監司不能奪遷惠安令以文章飭吏治公牘教

令無不手裁者毀淫祠五百區勤民至廢寢食其視  
權貴貌如也民訴賦不平輒考境內田均之以是忤  
權貴三載求去會擢守賓州軍民詣闕留撫臣亦疏  
請不許旣而忌者匿賓州檄令不得赴則罪以逃且  
列大計中遂和陶潛歸去來辭拂衣歸羅浮治逃庵  
而居有司爲闢石洞書院置田贍從游諸生名譽日  
起屢登薦剡銓部竟以大計故報罷都御史艾穆薦  
春及乃召守興國未赴擢同知鄖陽府遷戶部郎中  
榷稅都下卽中貴不假擬請覈九邊屯田具疏未上  
卒春及剛方廉介學行表表一時所爲文高古雄偉

出入秦漢所著有綱齋集肇慶順德永安惠安諸志

李學一

李學一博羅人幼穎異弱冠首鄉書隆慶戊辰進士  
選庶吉士未幾以外艱歸時山寇充斥益以海寇叛  
兵民莫必其命學一目擊傷之起復授刑科給事中  
嘆曰此所謂主上耳目臣也天下事無所不當言  
顧臣之耳目未及今積寇久爲患患當事者壅蔽之  
耳目請自此始遂上疏言地方當事諸臣掩飾彌縫  
無爲國家計者當責見任總督兩廣侍郎殷正茂要  
其成幼語甚剴切下兵部覆議正茂懼任事聞之大

怒而給事張楚城御史陳堂復上疏懇焉輔臣張居正以爲其說必出學一乃召切責之且曰柰何不容一殷司馬乎至是不能奪其議而殷正茂奉詔徂征分伍軍并力盡殲羣寇惠人忻若更生以爲功多殷司馬而議決於李給諫也於是御史楊一桂上言嶺東地遼闊奸民易爲嘯聚臣以爲長樂置府便而以惠之興寧和平龍川長樂潮之饒平大埔隸焉兵部尚書譚綸佐其說移咨勘議惠人皆以爲非宜學一從中揀之長樂之不府者學一力也內艱服闋復補吏科給事多所建明持大體不能承望出爲湖廣叅

議時居正家勢熏炙當事者多倚之學一絕無所附  
督學貴州得士心而湖廣御史承居正意指論其前  
事奪一級居正敗尋轉廣西副憲量移苑馬寺卿卒  
無子以從子載慕後

謝憲附李學顏

謝憲字汝慎歸善人不事藻飾癯然鶴立事父母定  
省如禮無私財爲邑諸生與葉天祐劉梧同舍志聖  
賢之學諸生不敢鴈行歲薦至京卒業太學歸則築  
臺居之葛巾木屐日携離騷往來西湖浩歌至暮而  
返憲學一稟程朱而多自得嘗於臺畔折竹枝濡赤

上註易訓友葉春及受而錄之名周易竹書時河源  
李學顏亦以諸生應貢不仕居鄉多大致嘗建議修  
復故城有堡障功後以子貴至中大夫

潮州府

戴瑀

戴瑀潮州海陽人行已峻潔經學修明洪武中以薦  
辟授南豐令均賦稅鋤奸黠宿弊盡革治化一新三  
年之後政平訟理民懷其德歌之曰山市晴山鳥鳴  
商旅行農夫耕老瓦盆中列酒盈呼囂噍突不聞聲  
二十四年建言九事 太祖覽之大喜曰瑀所言甚  
合時務通達事變大有關於政體 勅賜溫旨褒嘉  
召擢都察院左僉都御史瑀在臺中質直公正能持  
大體斥貪植良中外震肅二十五年卒于官賻卹祭

葬優典甚隆

吳裕

吳裕字敬昆潮之揭陽人成化戊子舉廣東鄉貢明年試禮部不偶入太學時吏部尚書耿公爲司業每試輒見稱許名益起壬辰登進士授南京戶部主事旬餘丁父憂服闋補原官監督京倉通州倉糧踰年再差徐州敏而勤慎出納無滯丙午陞本部員外郎於是耿公在吏部素知裕賢調補文選員外明年陞稽勳司郎中弘治戊申三原王公爲冢宰益加器重調文選司時王公負天下重望力欲清選法異時僥



倖以進取者一切罷去裕夙夜盡職凡擢用人才務  
合公議而小人多不悅者亦思避怨訪求去庚戌擢  
右通政專管武官誥命事既清簡不勞而治因念母  
太恭人老于家奏乞歸省既至丁母艱服闋復任已  
未始有太僕寺卿之擢裕居官以安靜自守適胡虜  
數入雲中寇掠邊將議出師顧馬多病死奏乞甚急  
日坐堂上選閱至發數千匹不足更出庫銀數萬兩  
往市當是時裕已嬰疾復治馬政過勞疾益作凡再  
上疏乞休致朝廷率勉留之已而疾劇竟卒年五十  
九聞訃遣官諭祭命有司造葬如制

黃勳附子一道

黃勳字守勳揭陽人領鄉薦中丁未乙榜授江西新  
淦教諭曰修己教人一也遂以振士風扶正學爲已  
任日與生徒講誦贅幣絕卻弗苟受生徒貧而勤者  
分膳周給或疑其矯問曰君若大用竟能始終爾耶  
曰學以地殊志以時改言語與心術異德之賊也道  
有顯晦大小耶旣六載遷柳郡教授柳士習卑諂欲  
以氣節勵俗見郡守長揖而已守督過不爲動居歲  
餘乞歸守悔謝語諸士曰士苟賤縛利祿由學不明  
耳竟歸居揭陽之龍山終身焉嘗手書恭默憂勤中

正六言訓其子一道曰終身佩服可已一道字唯夫  
舉嘉靖辛巳進士由戶部郎中擢守興化乙未考劾  
天下官員南京科道交章劾之一道落職時治郡僅  
八閱月輿論憤憤不平閩布政使徐乾暨按察使屠  
僑咸曰閩第一守也而絳吏議黜幽之詔何先是林  
方齋文俊爲會試考官一道方齋取士也守興化實  
方齋薦旣而方齋族弟殺人坐罪死祈恩一道曰曲  
人命之獄媚事舉主吾不能由是悟坐黜科道反其  
誣詞曰受林金巨千脫死囚獄然林獄實不脫竟無  
有辯其誣者後以上壽終于家

翁萬達

翁萬達字仁夫號東涯潮州揭陽人少穎異七歲時父爲解書至親親之殺卽悟曰斯異文同情之義也中乙酉鄉試時夢神人大書弘濟二字後見試卷批曰此子負弘濟之才夢乃驗嘉靖丙戌登進士授戶部主事權河西務疏戚畹侵奪官地商稅語甚峻

上可之會畿輔大饑奉命出賑減去騶從巡行勞來立法簡便周至民甚懷之完奏有金帛羊酒之賜出知廣西梧州府民夷揉處東西粵時興兵事一切供億悉力周給而尤以厚學校正風俗爲先咸寧侯仇

鸞縱健卒橫市肆間縛其首杖繫之後以稍戢會安南鄭惟僚上告莫登庸篡弒狀上命咸寧侯仇兵部尚書毛侍郎蔡督兵往討陞萬達爲廣西征南副使時關吏飫莫氏重賂往來不復禁常有伺我事以告之者於是密募敢死士梁文韜等入安南旬日盡得其狀乃下禁曰敢有出境與賊通者磔之籍其家因上議督府曰今日之兵有二議用與不用而已若兵不必用也示之急而急焉示之緩而緩焉弛張闔關其機在我以彰不戰之功可也若兵必用也則急而或示之緩焉緩而或示之急焉呼吸瞬息其發如

神以藏必戰之用可也至於備欽廉海濱之地以待窮寇之奔無謂今日姑可緩法曰先爲不可勝以待敵之可勝此之謂也會龍州憑祥土舍趙楷與韋應李寰等煽亂至許莫登庸爲鄉導乃與督府議曰兩州瓜連三兇鼎立迫之則變生肘腋宿之又威寢陵夷趙楷徂詐李寰梟勇未可速圖韋應悞懦寡慮可以立禽斷其中堅使不相屬而楷寰可次第獲也一日突至太平使人以他事召思明土官黃朝諭以大義朝設伏禽韋應以獻而趙楷李寰各就禽自是禍本悉拔斧鑕昭明積年稔惡蕩然廓清事聞有金綺

之賜陞浙江右叅政督府上疏以萬達曉暢戎務練  
達兵機宜終始安南以成安攘之功復改叅政于廣  
西分屯龍憑思陵等處簡士卒礪器械足饋餉誓師  
以聽獲安南間諜丁南傑訊之曰汝能爲我用乎曰  
能厚贈而遣之南傑密白登庸盛道中朝兵威之雄  
銳拒之徒貽禍境土於是登庸詣鎮南關親降遣其  
姪奉表入朝其詞甚哀 上乃詔罷安南爲都統使  
司賜登庸不死以都統使治其國奉正朔許以入貢  
班師論功陞一級賜以金幣擢四川按察使尋轉陝  
西左右轄時諸藩以祿俸不給聚訟比至裁處允宜

人人驩悅擢右副都御史巡撫陝西於是選將帥罷貪庸廣客兵儲蓄修器械固險要謹偵候明賞罰西北邊備屹不可犯是秋大同宗室充灼等潛謀出邊勾虜爲患廉得其情密令總兵周尚文發其奸跡以聞虜入寇督率官軍據險邊殺虜以遁去有王千斤者力戰死敵哭而歛之爲文以祭歸其棺具奏官其子立忠節祠祀焉邊人無不感泣願效死力復築邊牆東自老營堡西距滑石澗延袤幾二百里濠塹深闊曲盡其法自居庸以臨三鎮禾黍蔽野商旅絡繹比于內地 上復兩賜金綺陞兵部左侍郎廕一



子入太學又以禽縛逆灼之功陞左都御史兼官如故再賜銀幣廕一子己酉春虜人宣府萬達請以大同帥周尚文禦虜而自督兵數千人來援時虜勢張甚麾下將請止曰我志決矣誓不與此虜俱生馳騎先出衆無敢後者距虜僅四十里會西風大作索車數百輛曳柴以進塵霧蔽天咫尺不能辨虜驚以爲大兵至矣夜解圍而遁陞尚書兼左都御史尋召入本兵以父喪回籍庚戌秋詔奪情起宣大總督會虜犯京師本兵得重譴詔復改兵部尚書萬達方在籍病疽結廬墓間聞命單騎就道不下四十日抵京是

時虜新犯都甸百務恒擾 上日夕俟萬達至意遲  
之以問大學士嵩嵩不爲申理遂貶爲兵部右侍郎  
經略紫荆諸關以京察自陳乞罷終喪 上怒疑其  
避事免歸是年十月復起爲兵部尚書命下而萬達  
卒矣生平性剛志潔思深猷遠視抗千古心雄萬夫  
坦而有制沉而善斷故所至以威略著聞善御將士  
能盡其才而得其死力其料敵甚審臨戰每以身先  
士卒虜衆當之輒失其利庚戌之變 上趣召萬達  
達至不先計謝嵩嵩密使人諭指亦不應是時嵩子  
世蕃擅權黷貨無敢撓者慮萬達強執乃乘 上怒

媒孽之竟坐廢而卒隆慶初追謚襄毅言者稱嘉靖末年邊臣行事適機宜建言中肯窾萬達一人而已

章 熙

章熙字世曜潮州海陽人嘉靖甲辰進士授行人轉戶部員外庚戌虜薄都城援兵四集通州守吏以兵食告匱聞上怒切責尚書及諸曹郎貶熙爲山東行省幕史已徙南雍博士仍爲戶曹郎出爲廣西僉事分道蒼梧白馬三州故險道也江路逶迤林木深阻爲諸蠻窟穴熙至首咨民患苦白于督府檄縣邑各備大斧長鏡之屬以千數因下令調集諸路營兵

統以偏裨躬履其地勢高下而刊夷之盡伐其樹賴其山分兵守焉自是諸蠻奔突竄伏不敢復出事平遂投劾歸日惟以講學會友教子贍族爲事不復有用世之志矣

薛侃

薛侃揭陽人正德丁丑進士授行人以言落職從王陽明遊雖處困講學不怠兄俊舉于鄉弟僑舉進士俊子宗凱亦舉進士擢給事中所著有研幾錄

蕭鼎

蕭鼎字伯鉉潮州海陽人歲庚午領鄉薦會試途遇

有攜妻傭車赴京者其夫候驛逋文至而車行疾追不及遂相失在後者數日其妻少美鼎防禦之甚嚴同行者無敢凌及抵京夫始追至泣訴曰微大人妾身幾失所且死矣其夫感德執贄懇謝不受甲申登進士授工部主事往遵化理鐵冶冶所素弊甚多額課常欠又有青爲害伯鉉盡祛其弊蠹負課遂充且有羨餘其怪亦息三載秩滿改戶部主事出理德州軍儲慎蓄積嚴出納德人多其能久之陞員外郎往督江西福建供應之未完者所至餽贈秋毫不受兩藩諸名勝皆重之不數日事竣而還吏部薦知浙江

本朝分省人後漢書卷三十三  
溫州府事治溫歲餘疾作懇乞歸就醫藩憲大夫留  
之不得乃爲達諸吏部始得歸暨至家終於正寢得  
年五十有六溫人哀之

林祖

林祖潮陽人家貧讀書早孤遇寇亂失母弟所在遍  
歷郡縣訪覓至梅州山中得見爲獠人所阻祖乃潛  
赴梅州訴之得還相離十有四年矣人以爲孝誠所  
云久之中有司上其事賜衣九套鈔千貫官終河間  
府通判

蘇福

蘇福潮陽人幼穎悟絕人出口成章若有神助年八歲時嘗賦月詩其初一夜月詩云氣朔盈虛又一初嫦娥底事半分無却於無處分明有恰似先天太極圖他作皆稱是年十四卒

補遺

林興祖

林興祖潮陽人七歲而孤事母至孝洪武初舉孝廉授蓬萊簿丁母憂居喪毀瘠服除改邵武府倉大使歲饑府牒曰孰能詣巡撫請賑乎方隆暑衆莫敢應興祖慨然請行晝夜倍程比至撫臣覽牒未有言興

祖曰民命危急旦夕望公若慈母義形於色撫臣遽  
檄郡發廩所活數萬口郡守丁原振薦之擢當塗知  
縣有惠政遷代府長史當塗民乞留不許皆涕泣去  
召還改工部郎中遷廣西右叅議會安南平郡縣其  
地改交趾右叅議分守盤灘城亡何餘寇復叛圍城  
急先降者二十餘人主帥恐生變將殺之興祖曰不  
可已降而殺之何以示信徒以堅敵心耳寇卒解去  
在交趾再歲而卒所著有棠陰集

林希蔭

林希蔭揭陽人自幼能屬文博通經學尤精春秋敦



孝行父客死貸錢歸葬奉母甚謹母歿廬于墓有白鳥來巢蟾子千羣聚楹三日妻亡不再耦與潮士林厚善俱以孝聞永樂間同舉孝廉希蔭謂厚曰君幸親在宜祿仕余祿不及親矣奚仕爲厚繼舉進士累官叅政希蔭終不易志天順間海寇行劫過其門大書曰此林先生廬也慎勿犯嘗一日出遇賊希蔭衣冠坐舟中賊識之避去族兄與鄉人訟郡守不能決召希蔭至涕泣言曰至誠不能化族黨非善也證父攘羊非直也守益賢之著有逍遙歌二十四孝各贊以詩季子巖性剛介行義著於鄉不替父風

蕭鑾

蕭鑾宋漳州國梁之後至孫詢知潮陽始家焉鑾少勤學登宣德丁未進士授行人使甘肅亦力把刀及哈密多餽方物卻之 上嘉其廉擢監察御史遇冤獄籲者百口鑾獻出之左都御史王文有墨聲獨格其議鑾爭之愈厲竟得白擢廣西提學僉事興學育材居多尋丁母憂天順己卯復除湖廣時憲使楊珏謫知黃州與衛鎮撫許奏事下所司鑾按問如律珏由是謫戍甚啣鑾會丁生母憂去珏遂誣奏鑾通賄文致已罪事復下逮問無狀得終制癸未補福建僉

事尋擢山西副使有通政張瑄者謫知霍州刻剝部  
民百餘人伏闕上章有旨移鑾鞫問坐削籍爲民瑄  
反奏鑾陷已力詆之人皆直鑾奏乃寢居二年上疏  
乞歸不許再三許之去日士民遮道泣送抵家囊無  
長物時八桂諸生仕潮者皆嚴事鑾適有以賊隕名  
者輒泣杖之論者謂是道也將亡矣今世學士私樹  
桃李一入其鄉惟患其舉趾高耳蕭公亦猶行古之  
道也

李齡

李齡湖陽人宋延平之後大父依於魏遂以爲姓及

齡父子貴列朝籍始復姓少時嘗從父憲舉之官甫  
中過考亭故址心竊慕焉父卒益自發憤宣德己酉  
舉于鄉正統丙辰授賓州學正晉國子學錄尚書胡  
濙祭酒李時勉皆才之薦授監察御史督學京輔特  
晉詹事府丞入史館景泰丙戌典京闈後督學江西  
以躬行率士察其孝弟力田者禮之以爲諸生式後  
被蜚語去歸未逾月卒士論惜之先是齡嘗講學白  
鹿書院建二陸講堂置贍士田比卒以從祀焉又李  
若林舉宣德庚戌進士授刑部主事詳於法律病免  
家居後輩多師事之晚年益工詩文人稱二李云

吳一貫

吳一貫字道夫海陽人成化辛丑進士上高知縣質性明敏長於吏事其宰割一以廉勤興學除奸吏不敢欺士民頌其義擢御史巡按浙閩黜貪墨均徭役平漳寇所至風裁肅然累陞大理少卿嘗奉使經略邊務上安邊策數萬言皆見采用時宦官劉瑾專橫一貫以直忤謫嵩明州同知尋遷江西按察副使有靖寇築城功每見上高吏民如家人父子轉按察使行部至奉新卒于官民哀之立祠祀焉

王昂

王昂字抑之揭陽人兒時穎敏淹貫經史遭母喪枕塊幾殆登成化甲辰進士授永豐令覈詭籍革巫俗捕宿盜辯民冤興陋修廢不遺餘力時方旱爲民禱之第令童子號曰令有罪民何辜天不雨令可屠雨輒應又時大疫延數千家抑之親與按禳病者皆起以治行高第遷太僕丞理馬政窮其利病條陳一疏四千餘言將進遘疾而卒所遺僅詩文數卷宋史補數冊

莊 璵

莊璵字惇之揭陽人年十四游郡庠弘治九年丙辰

進士宰安福性峻潔不阿每事必札記而行要其成一稟於法或以召謗難之曰三尺法如是吾知奉法而已至延接邑士大夫雍雍如也無敢干以私朔學舍五十餘間以居生徒比考最疏乞改教調國子博士尋擢德府長史時宸濠蓄異志貌諸宗挾借祿米與持不與復禁絕其私交濠銜之陰謀構害與乃挺身往見詞色俱勃遂杖而下獄不與食三日衣冠危坐而死時咸悼之御史王完疏其忠嘉靖改元加贈太常少卿遣官諭祭

鄭一初

鄭一初字朝朔揭陽人兒時以高節自負弘治乙丑  
進士病免居紫陌山閉門靜修人有以千金求爲居  
間曰名義至重鬼神難欺且欲饒舌作說客耶却之  
後起巡按雲南風紀肅如聞王守仁講學請師事焉  
屢詒書勅子弟力學疏歸卒于杭

劉子興

劉子興字賓之海陽人嘉靖辛丑禮魁授臨海令以  
廉平著遷兵部主事歷閩總憲端介慎事俸入外不  
它取一錢轉粵西左轄致政歸行李蕭然家居十年  
恂恂誠慤有德讓君子之風嘗謂士人一解組卽宜



絕干謁若俛首喜事僕僕爲人役曾不若居官署鍵門謝客猶能遠俗焚持素節也其清修雅行爲潮士大夫宗以此所著有見湖遺藁論者謂跣跣之士恥譚樸茂請以劉公風之

林大欽

林大欽字敬夫海陽人生有異徵慧出儔等家貧每從人貸書年十三卽能通少微通鑑年十七失怙教授生徒以養母翁襄毅得其經義至請見許以國器二十應嘉靖辛卯試對李綱十事御史吳麟大稱賞擢第六人以語督學王世芳皆曰大魁手也遂連捷

禮闈比奉大對文益奇都御史汪鉉訝其起語不如制以示大學士張孚敬曰是嫻於辭進以備御覽可也遂品置第三進呈上得大欽策大稱意親題第一比制下海內翕然慕之授翰林修撰尋乞身歸養大欽夙以才自負于百家言雅喜蘇氏爲文亦酷似之第後稍任達厭繩墨獨窺玄理嘗著性日照空萬障論以見志故其行事時有出入而事母獨謹居喪哀毀以改葬歸道病卒于家

陳一松

陳一松字宗岩海陽人少孤貧事母孝嘉靖丁未進

上選翰林院庶吉士除兵部主事轉員外遷湖廣僉  
事以忤直指使乞歸終養母寢疾嘗湯藥衣帶不解  
者逾年比卒哀毀廬居免服補蒼梧僉憲甚得民心  
遷福建糧儲叅議催科撫字公私兩給遷湖廣憲副  
清聲彌著所至民立祠祀焉遷陝西大叅轉福建按  
察使復擢江西左轄出納惟公悉革常例擢應天府  
尹民遮道留又立祠祀之尋遷大廷尉晉工部左侍  
郎督修 皇陵役餘十萬悉歸公帑賚賜加俸服一  
級旋以乞省坐連疏得歸杜門謝謁卒于家諭祭葬  
之生平倜儻有大節不事脂韋亦不尅核人以此多

之所著有廷尉駁稿玉簡堂集

陳瑞龍

陳瑞龍字體乾潮陽人生有貴徵甚穎爲文立就少  
舉于鄉嘉靖庚戌進士授南京戶部主事轉員外郎  
會修 孝陵瑞龍董其役節繁汰冗親執朴行築甫  
九月而功竣叙功未報命尋出守興化奉母行初抵  
郡延見三老問民疾苦剖決持平民有鬪墻者反覆  
開譬令自省悔獨橫暴回遁者推鞠一無所貸時倭  
寇閩急日夜乘城設備以捍百姓會母病卒哀毀治  
喪將歸倭偵知之倖薄城下又客兵乘釁通賊孤城

急危城中父老無不涕泣乞留者而當道督撫諸臣亦移書強起之瑞龍乃感激墨衰臨戎募山中射虎者協水兵授以方略夜搗賊營藥弩俱發賊大潰棄營遁至寧海橋水兵夾擊之斬首六百餘級生擒一百三十人奪回男婦又數百人是時方在疚中以籌兵過勞疽發背卒百姓哀之旅襯旣還後兩月城遂陷論者謂失一于城天之不惠莆也

鄭旻

鄭旻字世卿揭陽人博聞強記登嘉靖丙辰進士初授兵部主事歷武選郎中出守大名歸德蠲逋革弊

卓有治聲督學貴州山西所察士百不失一尋擢湖  
廣參政是時江陵柄政仕其鄉者疲於奔命旻獨正  
身率屬不激不隨百務釐舉庭無滯牘一時以爲難  
後遷四川憲使晉貴州左布政察匿田正詭籍豪酋  
凜然未暮月卒于官百姓哀之旻生平慷慨有大志  
與物無競家居惟耽泉石侶琴鶴吟咏自娛而已所  
著有裒拙稿崧山談言祀貴州名宦

唐伯元

唐伯元字仁卿澄海人  
生而凝重天資穎異學問淹  
賁登萬曆甲戌進士初授萬年令爲民築堤緩賦積

貯賑饑尋改泰和俱有惠政滿秩晉南京戶部主事  
去兩邑民並祀之後爲郎進石經大學 上留覽焉  
以言官擿其詆斥新學謫判海州亡何轉保定推官  
尋擢禮部主事且疏請端大本間引 世宗遺詔語  
極忠剴 上爲感動辛卯典湖廣試得士備一時之  
選尋晉尚寶丞宅艱服闋補官轉吏部員外歷文選  
郎中時 上方督過銓衡懼罪兢兢伯元一意剔弊  
銓曹清肅會太僕少卿闕太宰薦入未下兩疏乞休  
歸踰年卒年五十八伯元學本誠意其爲文根極理  
要所著有醉經樓集禮編易註太乙堂采芳亭稿白

沙文編二程類語

薛宗鑑

薛宗鑑字子脩潮州府揭陽人嘉靖癸未進士兩令  
將樂建陽以治行第一擢拜給事中疏論冢宰汪鋐  
內懷欺罔外飾忠愛惡貫四凶行兼正郊鋐被斥逐  
宗鑑下詔獄賜杖八十不勝痛楚凡五日而死



瓊州府

葉禎

葉禎字夢吉號確齋瓊州府臨高人永樂鄉薦授潯州府同知加意撫民每取古良牧之政宜於今者次第行之禎家壤接廣右峒猺竊發爲鄉人害心每懷不平迨官潯州正羣猺出沒之衝抵郡旣條合行事宜建白於督府復與父老有智略者圖禦寇之方增括民丁壯編爲什伍置長分領之躬鞍馬服弓矢日號令訓練諭以保衛鄉井之意咸踴躍思奮峒酋韋疆積年劇賊也官軍聞之披靡莫敢誰何禎設伏生

擒之其黨狃于常勝益憤耻互相援結必甘心焉後  
已未幾掠旗山復敗之越數日盡合猺黨攻劫雞刺  
等村報至郡守方與都指揮黃鉞會飲學宮恬不介  
念禎拂衣上馬督民兵合戰于柳青舖孤軍無援竟  
以大潰賊積怒攢矢刃向之禎身被數創叢矢如蝟  
尚手刃三人與其子公榮從子官慶民兵三百人皆  
死焉嶺南素無雪是日雷雨大作平地雪深尺許賊  
棄圍去忌者反以激變誣之郡民相率走千里懇於  
督府事甫白具聞于朝詔贈廣西右叅議直指  
復命建專祠祀之

唐舟 附子亮

唐舟字汝濟瓊州瓊山人學優才膽中華除間鄉試  
永樂癸未復試中第二名甲申舉進士授新建知縣  
始至簡易御下若尋常然久之名愈著上下大服有  
問其故曰古人所謂新任如處暗室輕動必有觸損  
久坐自明未幾應求賢詔起赴京陞江西僉事整肅  
紀度郡邑承望風采舊南昌守懼先隙闖門不能仰  
視舟待之加禮衆服其量後以微累降判衢郡卽折  
憲節盡安輯撫綏之道以非辜從戎隆慶衢人思之  
不已 仁廟登極大臣首薦爲監察御史卽抗辯內

侍陷黃本固等數事風節愈勁出按浙江所至多政  
譽爲人胸次坦夷光明無纖芥畛域待已接人任真  
自信敎歷中外餘三十年所至有冰蘖聲嘗題門帖  
曰雪霜半染中年髮天地應知暮夜心見者歎服及  
歸杜門不出家無檐石之儲處之晏如鄉議高之年  
八十二無疾而終子亮字景明幼隨父任衢州游常  
山學中永樂丁酉科浙江鄉試戊戌登進士除直隸  
泗州判官改詹事府主簿旋改王府長史司奉祠永  
樂二十二年九月 仁宗以舊恩賜鈔幣擢寧國府  
同謝恩詩曰內侍傳宣出建章東宮寮屬被恩光親

勞御手分文錦又勅中官賜玉漿五品大夫名不忝  
萬年 天子壽無疆小臣戀國心長在時望彤雲捧  
玉皇後歷官至湖廣布政

邢宥

邢宥字克寬文昌人正統辛酉以禮記領鄉薦戊辰  
登進士明年拜御史蒞四川道景泰庚午常熟民有  
誣匿太監王振家財者詞連二十餘人宥奉命與錦  
衣千戶于信往鞫之至則辨其誣信恐得禍宥曰豈  
可避禍而文致人罪耶竟辨之辛未巡按福建鎮守  
薛尚書希璉與許御史士達相訐奏事下宥宥一以

實覆不少避或疑鄧茂七餘黨生亂欲以鎮東軍易延平軍宥曰人情重遷山海異習徒之適恐致亂卒不徙民有坐盜死罪臨刑寃號不已宥曰盍姑緩之踰月果得真盜築永安四城奏留班匠助役城成民不告勞甲戌巡遼東瀋陽軍官盜官儲者三十餘人宥以瀋陽三面拒敵奏止黜爲首者二人餘皆罰贖守城未幾賊至賴以無虞副將焦禮有功主將曹義欲冒之都御史寇深黨焉宥執不可遂成隙丙子乞歸省天順戊寅還朝巡河南革省驛遞復民地取之藩府錄罪囚可矜疑者民皆稱快庚辰績滿擢知台

州府府吏舊皆僦屋以居而新叅者輒入公費金宥  
卽府治東關地免新叅金令自治屋三間甫三年吏  
盡有舍尋以巡按時事就逮父老有懷金竊餽者宥  
曰吾無用此謝絕之左遷晉江縣丞成化初復起爲  
蘇州府蘇田賦甲天下攬納者滋爲弊賦因以虧宥  
痛繩治責償且得餘錢數千緡因以闢永豐倉築沙  
湖長堤甃運道橋梁爲永久利民俗喜奢率以儉約  
諸遊宴亭館老佛殿閣一莫之顧成化丙戌大水民  
飢開倉廩并募勸得米八十餘斛賑之民猶不給相  
聚持券入富家強取卽日榜諭許民持書券赴府府

召鄉老引領往貸其不發與強取者俱抵罪又得米  
八百萬斛猶不給會計軍餉足一年尚餘二十萬斛  
亦舉貸之同官以專擅爲慮宥曰民命在須臾待報  
則無及矣吾當任其咎民賴全活殆四十萬口事聞  
上賜勅褒獎陞浙江右叅政仍視府事是年秋遂擢  
僉都御史詢吏治察民隱獎廉能黜貪暴開丹徒二  
河築奔牛闡華儀真淮安兌運米重曬諸脚費清湖  
坡田賦減門攤商稅規畫賑濟斂率有法理兩浙鹽  
罪僞造引私販渠魁數十人官給煎鹽具俾濱海民  
兼主之山居者出米給焉民兩利之鹽賦無虧己丑



罷官百七十餘人帖帖不敢有怨語庚寅秋議事  
至京乞致仕章再上乃許焉既歸別號湄丘道人作  
湄丘草亭記以自見間語及祭禱曰謂里無良醫市  
無善藥不忍坐視勤於祭禱以紓愛敬則可若謂鬼  
神能生死人則萬無此理卒年六十有六

薛遠

薛遠字繼遠瓊州瓊山人正統七年進士授戶部主  
事陞郎中覈實直隸通稅得羨餘若干萬督大同軍  
儲邊食爲足天順六年使交南還陞本部右侍郎丁  
憂適河決河南召以工部侍郎起復往治河口遂塞

復改戶部成化六年王師有事于兩廣遠奉命總督糧餉以功陞左侍郎既而進尚書總督京儲十三年乞致仕許之十五年召爲南京兵部尚書叅贊機務十六年以被論劾致仕弘治五年以詔例進階榮祿大夫未幾卒年八十二訃聞賜祭葬如例遠通變勤敏朝章舊典多所練習在戶部久爲主事郎中時凡移文奏札多出其手上率推之至爲尚書旣致仕而復起人不能無議云

丘濬

丘濬字仲深瓊州瓊山縣人少孤力學天資過人六

歲能詩弱冠著論謂許文正公仕元無能改於其俗  
又不得行已之道不仕可也者儒碩師見其論初甚  
駭之已而又深服以爲先儒未有言及此者正統甲  
子鄉試第一兩試禮部名在乙榜當授教職辭卒業  
太學祭酒蕭鎡深器重之爲之延譽繇是名益重景  
泰甲戌中式禮部選庶吉士讀書秘閣七年授翰林  
院編修自六經諸史九流箋疏之書古今詞人之詩  
文下至醫卜老釋之說靡不深究發之文章雄渾龐  
麗四方求者沓至碑銘誌序記傳詞賦之作流布遠  
邇然非其人難以厚幣請之不與天順七年兩廣川

兵經年不決濬條列事宜李文達一見卽代上之

英宗嘉嘆付所司舉行八年 憲宗登極充經筵講

官成化元年陞侍講與修 英廟實錄或謂少保于

謙之死當著其不軌之迹濬曰已巳之變微于公天

下不知何如武臣挾私怨誣其不軌是豈可信哉衆

以爲然功過皆從實書之三年實錄成進侍講學士

五年丁母憂九年服闋復原職十三年續修宋元綱

目成陞翰林院學士濬自出已見撰史略謂朱子綱

目以正統爲主然秦隋之未有不可遽奪漢唐之初

有不可遽予者乃作世史正綱以著世變之升降明

正統之偏全有裨世教本年陞祭酒十六年加禮部  
右侍郎仍掌國子監事復謂西山真氏大學衍義有  
資治道而於治國平天下之事缺焉乃采經傳子史  
有及於治國平天下者附以已見作大學衍義補直  
孝宗嗣位之初其書適成乃表上之上覽之甚喜  
賜白金紵絲特陞禮部尚書掌詹事府事且命錄其  
副付書坊刊行修 憲廟實錄充副總裁官弘治四  
年實錄成加太子太保本年冬兼文淵閣大學士入  
內閣在位務以寬大啓 上心忠厚變士習凡人才  
進退政事廢舉一惟 祖宗舊典是循五年天變上

疏萬餘言大槩論 上改元之初歲在戊申與洪武

初元同符宜釐革庶政盡復舊規內擬二十二事陳  
時政之弊其略曰成化間彗星三見遍掃三垣地震  
無慮五六百次邇者彗見天津地震天鳴無虛日且  
異鳥三鳴於禁中考諸經史天變莫大於彗孛在三  
垣三台尤爲重地變莫大於震動在京師邊陲尤爲  
危急矧禽鳥動物得氣之先春秋二百四十二年書  
彗孛者三地震者五飛禽者二今乃屢見於二十五  
六年之間變不虛生必有其應天人相與甚可畏也  
臣願體上天仁愛念 祖宗基業端身以立本清心

以應務謹好尚勿流於異端節財費勿至於耗國公  
任用勿失於偏聽禁私謁以肅內政明義理以絕邪  
奸慎儉德以懷永圖勤政務以弘至治庶可以回天  
災消物異帝王之治可幾也疏凡十餘萬言 上命

諸司議行又請訪求遺書 上皆嘉納洪武永樂以

來凡百司朝覲命吏部都察院考其尤不職者乃黜  
之不過數十人其後吏部務以多黜爲公方岳以下  
少有微瑕輒黜之黜者亦不敢訴濬深知其弊言於  
上曰唐虞三載考績三考黜陟今有居官未半載而  
黜者所黜徒信人言未必皆實此非唐虞之法亦非

祖宗舊制也。上深然之。會吏部上大小庶官當黜者幾二千人。乃勅凡歷官未三載者俱復其任。雖經一考非有貪暴實跡者亦勿黜。盖用其言也。七年加少保兼太子太保。改戶部尚書。武英殿大學士。以目疾辭。不允。八年卒于官。贈太傅。特進光祿大夫。左柱國。謚文莊。官其孫尚寶司司丞。濬性剛直。與大臣論政議所未安。必反覆辯論。言官論事亦以是非詰之。不肯媿阿。取悅無歲。不求歸。前後凡十三疏。上皆不允。問勞賜賚之。使踵相接於門。初經生文士以奇怪相高。或不可句濬考南京鄉試。及禮部會試。凡怪



辭險語皆痛斥之怨誹不恤也及爲祭酒尤諄諄爲學者言之文體乃復渾厚士有慕道德者或過爲詭異之行以徼名澹因考會試發策言之士乃知道以中庸爲至詭異不足貴也其在太學論者謂師道尊嚴無愧李文忠公綜理微密則文忠公不及嘗謂朱子家禮最得崇本敦實之意然儀節略焉爲考諸儒所言作家禮儀節使好禮者可舉而行朱子微言散見於傳註語錄學者卒未易求乃采其精切者彙爲二十篇倣魯語作朱子學的其他著述甚富世稱博學爲我朝之冠云

王佐

王佐字汝學瓊州臨高人少受業於丘濬弱冠正統丁卯以禮經魁鄉薦遊太學爲祭酒吳節司業閻禹錫所稱許監試每擢爲首延譽于內閣李賢冀其大用後試南省五策條答無遺本房欲寘魁選爲忌者所黜成化初授高州府同知時都御史韓雍用兵兩廣佐獻策平戎用之動中肯綮雍竒其才甲午改邵武以文章飾政事持身廉而不徼事上恭而不阿屬泰寧盜發時僉事章懋適分巡至郡檄佐行縣召集里老密切訪問賊中動靜若其可招則選其里老之

有識幹者往諭之除首惡不宥其餘脅從者悉聽自  
新若不可招則亦令其各陳勦捕方略以報佐至縣  
周詢衆論皆以爲賊勢方張若遽攻之則其黨必固  
結以拒戰而其勢遂成不若乘其衆心未固誘其來  
降者以殺其勢則可不攻而自潰矣佐遂遣人招諭  
降其脅從者數十人賊果散去同寮聞之有欲邀功  
希賞者言於部使者謂懋儒者不知兵恐不能濟事  
願自行勦之部使者信其言遂調將樂所官軍俾率  
以行至則賊已平矣乃械繫佐所招降者凱還獻功  
悉戮之懋恥與爭而佐亦絕口不言惟與人頌其靖

亂安民之績然終亦無由白於上也滿九載去改同  
知臨江府致仕臨江與人又頌其公平正大博學工  
吟詠以賢能著稱云佐所至廉操遺愛始終如一日  
惟質直任職不能隨時俯仰故低徊二郡二十餘年  
一官不徙衆皆惜之平生雅淡惟耽書史自少至老  
手未釋卷雖耗贖猶使家人讀而聽之提學新喻胡  
榮稱其博學多識精思力踐見道精審故其詩辭和  
平溫厚文氣光明正大當比唐宋諸大家識者以爲  
確論所著有雞肋集經籍目略原教編庚申錄瓊臺  
外紀其經進御則有珠崖錄世稱其文行年八十五

卒

唐 胄

唐胄字平侯瓊山縣人弘治戊午舉於鄉壬戌成進士授戶部主事丁外艱服闋值逆瑾擅權謝病不出瑾誅起復以母老乞終養益肆力於學蓋家食者幾二十年 肅皇帝入嗣大統始赴召爲戶部主事時蘇杭織造遞遣中貴人往大爲民害上疏諫止詞甚剴切已又疏請出內象又疏爲宋死節諸臣請謚立祠其所論列皆有關政體時論韙之癸未春分考會試所得多名士陞本司員外郎尋擢廣西提學僉事

以身範士督師生習冠射諸禮卽僻邑遐陬巡歷皆  
遍丙戌陞雲南副使備兵金騰飭號令治軍旅境內  
肅然土酋莽信橫虐莫敢誰何遣壯士計禽之逮其  
黨八人俱論死保山令趙九臯與其子明引逆賊劉  
七餘孽承檄漁民民苦郡吏弗能制胄械繫之九臯  
坐盜邊錢糧例斬其首以殉明坐抵命宣慰木邦孟  
養爭地構兵連歲鎮巡議興四省師往討之胄曰毋  
煩師是可不戰而下乃覈木邦先世與地所由諭以  
國恩木邦感激獻地兵遂寢丁亥改本司提學副使  
其所選士一如西粵時會有尋甸之變總制提兵來

者柄臣私人也囑以故人子不聽時三司憚其威議  
迎叅皆跪胄獨不從䟽乞致仕不允陞雲南叅政已  
已表賀如京諸郡邑例餽夫廩皆卻不受既至見京  
貴一無所遺上䟽請崇聖德 上嘉納焉陞本司右  
布政使壬午入覲陞廣西左其年至廣西時桂林盜  
發喜掘富家塚王府諸巨姓惴惴且夕胄計獲渠魁  
七人誅之古田鳳凰寨韋賊尤大肆掠時調土漢兵  
征之無功乃屬其令劉朝輔曰往諭吾意天兵不可  
再干如急來吾能生之朝輔如命往賊曰是布政果  
前提學耶卽解甲與朝輔偕至受質而還輯其衆境

內大安蓋胄往提學時嘗諭諸徭送子入學受書遺  
風猶有存者先是各鎮守將月領銀賞徭名鹽魚銀  
軍器局月支糧給軍名軍匠口糧胄按掌故謂洞首  
能戢諸徭無掠乃賞今各處警報何賞爲祗官吏冒  
耳軍器局造以年今元年造未已而支糧至十二年  
何也悉禁絕之靖江王府宗人受封輒請補祿自登  
名玉牒日始胄曰祿與爵偕應始自拜封從前誤也  
且以靖江一府月補祿米八千石今天下諸藩費當  
何如者遂疏其弊於朝宗室羣齟齬之屹不爲動得  
旨俞允通行各藩著爲令胄在西粵功績尤偉他如



疏請不隨王府慶賀不行王府叩頭朝禮及戢客兵  
不敢爲暴人聞之皆吐舌癸巳陞右副都御史提督  
南贛汀漳甯以開府四省重鎮而贛城卑小何以示  
威乃增築樓櫓雉堞擬諸都會按兩廣軍興條例著  
賞格置湖西道檄守巡分駐臨江吉安令緩急可倚  
官軍遠邇帖然僅半載改山東巡撫再乞致仕不允  
時值旱焚香祝天行藩司分禱嶽瀆諸神連日大雨  
郡邑多蝗撰祭文命長吏倣周禮春秋穰祭是歲無  
蝗有蝗飛自邳淮來過沂州不下歲則大熟是時方  
尋黃河故道以疏三郡水災覈通省荒田給民牛種

墾之爲世世永利未就而陞南京戶部右侍郎丙申  
春改戶部右侍郎迨秋轉左會安南弗靖廷議興師  
往問罪胄曰交南道路險絕出師必無成功且得其  
地不可郡縣永樂中事是也因疏力言其不可者七  
事武臣郭勛怙寵請其祖配享功臣廟復疏請止  
上皆虛已可其奏後以議獻皇帝饗禮忤旨詔  
獄廷杖歸踰年而卒隆慶初奉詔卹錄晉右都御史  
賜祭葬如例

陳實

陳實字秀卿世爲瓊州瓊山人舉弘治壬戌進士始

通朝籍卽以疾謁告歸尋遭父監察公喪服闋未起  
逆瑾矯詔例勒除名瑾敗起爲南京江西道御史時  
內臣趙蘭以內旨採珠於合浦騷民黷貨實劾罷之  
尋以母喪去服闋復除廣西道辛巳出按應天諸郡  
舉刺無所遺蕪湖有沙灘民業葦利中貴有爭其地  
者奪而有之實奏還於民嘉靖改元擢知常州至則  
嚴叅見之儀謹文移之式而於前政不擅更張誠待  
羣吏裕處諸邑政有禮存刑有教寓規爲遠大而不  
屑近小朞月間上孚下悅稱循良者同然一詞歲值  
大祲民率走死無弔巡撫請發內帑銀分賑不足實

憂之甚檢庫中羨餘得無名錢萬緡將盡發以益之  
主者曰此故以供郡吏燕饋諸雜需者也柰何發之  
曰庫皆公錢賑饑與燕饋孰輕重緩急卽日令糴穀  
貯之倉或勸分富室實謝不聽曰人各爲家勸猶斂  
也如吾心何是冬有年大慰悅浙東海道倭人入貢  
與民交貨羣鬪殺人都指揮以下驅焉而被害者一  
人傷者若干人事聞於朝朝議守者不豫欲置重法  
上遣都給事會巡按御史臨覈之實與其實言倭  
來以貢不以寇事出不虞安能豫知雖然官以備名  
亦不能無罪焉若加重法則過矣至於士卒於主將

死不赴救自有常法亦不可加重如實議以聞上  
從之既歸常病士習之浮靡欲以正學倡之謂宋龜  
山楊先生嘗與鄒道卿數君子講明程學於常留寓  
甚久親炙私淑故有淵源乃建書院於城之西隅以  
祀龜山配以道卿而下十人榜曰道南取程伯子送  
龜山語也其他積弊數事次第搜革或談及修船累  
人輒爲興歎方圖處之而不可作矣卒之年距其始  
生才五十一甲子而已

鍾芳

鍾芳字仲實先崖州人改籍瓊山弘治辛酉領鄉薦

第二正德戊辰進士選翰林庶吉士授編修以忤時  
左遷寧國推官陞漳州同知精於吏治政績大著歷  
官南京戶部員外郎署吏部稽勳司郎中轉考功陞  
浙江提學副使校文必上名檢挑撻諧蕩者文雖工  
必懲浙士斐然向風陞廣西右叅政去貴縣虎患諭  
降洛容賊討田州叛酋岑猛定平樂藤峽屢有軍功  
捷聞兩賜金幣陞江西右布政使凡藩祿軍需之難  
處者區畫悉得大體陞南京太常寺卿疏言祭告禮  
稱 上意陞南京兵部右侍郎改戶部右侍郎奉  
勅總督太倉經略邊儲漕政大舉甲午七月南京

太廟災自陳修省以回天變言甚剴切且乞休上重  
違其請准致仕居家十餘年未嘗一至城市惟以書  
史自娛名其居曰對齋取對越上帝之義有干以私  
者謝曰吾守志猶嫠婦豈以晚而改節耶甲辰卒於  
家訃聞贈右都御史賜葬祭

海瑞

海瑞字汝賢瓊州瓊山人以鄉舉爲南平學教諭初  
至謁上官止長揖曰吾師席也可屈膝乎因著論云  
孟子言爲貧而仕者非也抱關擊柝委吏乘田無在  
非道而尤莫如教職蓋人材所由造世運所由理其

職亦何尊且難乃稱爲貧哉自世沿此說不察故居  
此官者多媸媸不舉其職士習蠹而吏治媮所從來  
矣持論若此尋進淳安令淳巖邑也地瘠而民嗇所  
產茶竹杉柏外無他物且重巖複嶂民易逃匿山下  
田畝悉歸右姓窮民卒歲不粒食又當新安下流諸  
官舫日五六至夫役迎送費不可支慨然思拯之初  
入署例有燕第以祀神牲草草治具乃召丞尉若學  
官弟子若耆老以次列備陳所爲奉法字下意甚悉  
竟日散去淳安人固沾沾知令志有在矣無何度田  
定稅不使窮富得上下其手官署中有隙地課老僕



樹禾麥藝蔬芥旦夕取自贍自江水外無關淳安者  
胡公宗憲總制浙直權甚重家僮過淳安曾無加饋  
制府竟無讓一日語藩臬曰昨聞海令爲母壽市肉  
二斤矣蓋異之也豐城鄢懋卿由中臺出理鹽政勢  
張甚所至縣令如上供以得無叱辱爲幸維楊三臺  
使醵宴之費至千餘金鄢將往徽齊雲牒所過郡縣  
供辦令甚峻及淳安乃爲書上鄢甚言邑小不足奉  
迎至且見罪願取他道往且言汰侈不可爲與小民  
不當虐者甚具鄢得書色變久之遂罷齊雲行曰令  
言是也藩臬郡守聞之股慄曰令何戇幾累我輩矣

時已晉嘉興別駕鄢私人御史袁迎鄢意以他事摘之從舊職論調興國興國地故單薄歲賦不入民苦浮糧爲患因述八事上之中丞而獨亟清丈以甦貧民而均其賦已陞戶部主事時 肅皇帝尚玄修朝政多曠慷慨言天下大計謂興土木爲傷民數推廣事例爲鬻爵以師陶仲文爲非體以仙桃藥丸爲怪妄甚者以不見二王不還大內誹謗猜疑僂辱臣下爲薄于父子夫婦君臣其言皆敵以下所不能堪者上震怒投其章于地已徐閱之意若爲動者留踰月不下而會 上意有所不可遂下瑞詔獄中外縉紳

相顧失色而直聲亦遂聞天下亡何 肅皇帝崩  
莊皇帝奉遺詔出之獄還其官尋改兵部主事已晉  
丞尚寶丞大理南京通政入爲左通政遂以僉都御  
史撫應天時威名籍甚中外墨吏往往望風解印去  
權豪怙勢之家宰相戒毋敢犯一顯者賴其門以居  
聞瑞至卽易頰而黥中人監造者以八人肩輿行見  
瑞亦減其半云吳故有松江滙震澤入海瀕江田藉  
其灌溉已爲潮齧淤于陸瑞斥羨募工乘輕舟躬督  
畚鍤開濬之不旬月而成又吳俗貧富相傾弱者率  
獻田于其豪以爲奸利輸不必入獨卵翼窮民而摧

折士大夫之豪有力者是時吳中貴人無逾華亭相  
按問其家無少貸而弟侍郎陟武斷殘民輒逮治如  
律盡奪還其侵田自是士大夫之名貪暴者多竄跡  
遠郡以避小民始忻忻有更生之望矣瑞嘗論欲天  
下太平惟有井田一法井田之壞而不復也惟有亟  
奪民田一言至于不得已而限田又不得已而均稅  
策斯下矣然猶爲井田之遺意故其令疲邑撫三吳  
皆以清丈爲急而力行條編一法令額外征徭不至  
重困之至今小民得保守田業相率繪其像而尸祝  
之比比也然竟以奪富民田府怨而議者亦以此中

之遂解官歸里居十餘年九卿若臺省前後薦者無慮十餘疏起南僉都御史旋以爲南吏部侍郎比至首陳治安要機謂今日貪墨姦決不可縱而歸本君身多責難語疏奏上深鑒其忠屢欲召用而柄地有陰沮者乃以爲都御史掌南院浹歲三遷皆出特簡海內端人舉手相慶以爲特達之知而小人之不便者顧目爲迂闊詆之甚力章亦寢不下因屢疏乞歸竟以丁亥卒于官卒之日貧無可給棺槨士大夫醵金以殮士民慟哭至罷市者數日祭于塗累數百里不絕訃聞贈太子少保謚忠介

鄭廷鵠

鄭廷鵠字元侍瓊州衛人嘉靖戊戌進士授工部都水司主事大司空竒其才居三年闔豎仄目不敢干以私以父艱去起復禮部儀制司主事尋給事吏科轉工科以京師地震條陳黃花鎮古北口等處俱京師後門屬者設石匣營恐城孤力薄請遣司馬侍郎督之築關城增水壘夏滂庶不爲齧秋高虜無所乘貴州地連三藩勢不統一總督巡撫不兩置置一控三重其權干法便京師草場併御馬等領之者率歲遷因以滋弊願三年爲限蘇松等郡以才賦雄天下

乞專設叅藩董而責成之四者皆國大計也庚戌當  
大計吏䟽皆手出以公正稱又論三途取士䟽無慮  
數十上陞江西督學副使轉叅政以母老乞終養居  
石湖爲娛撫按官交薦之廷鵠性介謝官屏居闕於  
問遺竟不起著述數十種凡百餘卷

王懋德

王懋德瓊之文昌人也舉隆慶戊辰進士由南京比  
部郎出爲金華守前後無善去者而獨以廉察擢江  
西副使已晉福建右叅政瓊官在海外而父封公良  
弼與母偕年八十餘爲吏十六年於外矣無子多餌

燥藥攝建南篆歸而得消渴疾先是延平人有病此者以溺甘爲死候試之甘度不可起乃請歸同官者謂疾不可涉遠固留之曰懋德之違定省十有六年願徼福諸君萬一生見父母死且瞑不然而死道路吾志猶南首也於是僚友爭致贖固推不受曰吾瓊故魚米鄉家粗自足吾以十六年所餘月俸佐仲產爲二親養安所事諸君贖且吾不留而亟行懼以歸視爲閩人累也聞者莫不感泣至延平不能前竟卒卒之日神爽不亂爲書謝僚友誓不受裝費按使者以爲不可遂循故事括六百金遣使傳護之渡海至



瓊授金封公亦不受曰吾子業有成言吾卽耄奈何  
沒六白金以傷吾子之義吏固請而封公固益卻竟  
令持歸僅收其奠金曰爲我謝諸大夫老且死海外  
無能報也其父子之能以廉介相成如此

丘 敦

丘敦瓊山人性簡默初就塾師疑其不慧及濬遭喪  
留敦于家敦乃盡讀所儲書足不妄至公府對客如  
土木偶不輕出一語有司開高雷間故河以便往瓊  
敦寄濬書謂疏治失宜恐先貽害元人治河因之召  
亂往事可鑒濬得書始知其不凡屢趣還京以廕爲

太學生試不第遂屏去舉業研究經史百家其學以  
精思自悟爲主終日凝然無言繼以通夕不寐有所  
得輒發爲文多不起草落筆如飛時見佞倖李廣輩  
將復成化故事又作發冢論攻宦者蓋取莊子詩書  
發冢之義設爲甲乙辨示其友蔣冕思母不置漸以  
嬰疾弘治三年卒于京邸年三十一敦雅尚儉素生  
長相門自奉如寒士海外俗侈巨室子弟多乘輿馬  
敦獨徒行遇者望而知其爲敦也性剛介少容辭受  
最謹瓊守遣訟者餽五百金使爲解紛敦斥去之嘗  
夜宿會河夢有石棺嚙於水盡露而映其一方明日

過之儼然夢中見者亟掩以士卒時蔣冕哭之慟序  
其書行于世季弟京廕中書舍人性仁愛重義樂施  
大征後白骨遍野盡收瘞之會大疫救以良劑活者  
甚衆有祖風焉平居罕至城邑當路重之敦孫郊亦  
以廕授尚寶司丞與弟祁友愛尤篤腴業悉讓祁祁  
不受則曰我有官矣宗黨多其義

曾鵬

曾鵬字元翰瓊山人父英以鄉薦宰茂名清苦愛民  
民以父呼之鵬登嘉靖癸未進士知龍溪兵荒相仍  
乃緩征斂捐俸修學築八都諸堤有惠政民立石頌

焉祀名宦擢刑部主事歷福建副使辯冤獄如神改  
貴州備兵都勻旬月平土酋蒙鉞之亂招降凱口賊  
阿向適鵬晉叅政未行分守某欲自以爲功乃率衆  
襲賊全軍覆沒撫臣恐急檄鵬終其事至則單車入  
賊壘賊駭曰聞公已遷今猶在耶鵬爲言禍福遂解  
兵聽約束未幾以足疾乞休疏三上不許乙未入覲  
時武定侯郭勛當國外官多饋遺者鵬曰吾平生不  
能阿諛今老矣柰何白首改節會有啣之者遂歸海  
忠介稱鵬爲先輩師法最彰著云

林士元

林士元字舜卿登正德甲戌進士授行人奉使冊封唐府餽金六十鎰卻不受王深器之乙酉擢南京戶科給事中劾光祿少卿史俊怙勢殺人都御史汪鉉考察不公並劾罷內外不職者數十人仕路爲之一清條陳時務先後數十疏皆極剴切壬辰擢湖廣副使備兵衡永江華流民與土戶爭田構兵連年禍延諸郡士元單騎入諭以利害遂息吏部郎中鄧尚義弟挾制守令侵牟里黨按以法轉廣西叅政分守蒼梧戊戌征大藤峽士元督餉紀功有貴勢子弟希報功次絕不假借捷奏擢浙江按察使未赴以憂歸遂

不起祀桂林名宦晚年家居時或戴笠躬耕鄉人賢之所著有學庸二論及孟子衍義讀經錄讀經附錄孔子世家顏子列傳討論北泉論草及文集十卷

吳會期

吳會期字行可瓊山人篤行古道鄉薦時僉憲汪鉉以所罰黎民悅七十金爲餽會期受而還之民悅登嘉靖癸未進士授南京戶部主事轉工部郎中營

九廟稱旨嗣修七陵內侍高忠翼管私橐會期不與旣告成省費十之五上嘉悅進正四品俸服時嚴嵩當國欲會期附已私語會期同官熊某曰此郎

視京堂若固有足不一至吾門何迂也會期間之作  
迂愚解嚴益嫉之言者承望意旨論謫于外遂拂袖  
歸 肅皇帝晏駕衰服宿崇文院三日隨有司行禮  
歸倚廬于中門外者二十七日其忠愛若此立家廟  
置義田日與親族相規勸海忠介瑞稱其貌古心實  
直指陳道基表旌其門

黃顯

黃顯字仁叔瓊山人嘉靖辛丑以進士授刑部主事  
於獄多所平反抵中貴呂洪賊罪雪總兵沈希儀誣  
誤皆不爲當軸屈出守撫州罷築千金陂以蘇民困

宛逋數萬而刻核不及于下郡民感德立祠祀焉以  
憂歸補池州池故饒山澤利顯益謹身帥下不少私  
狼兵自湖趨浙所過殘暴顯以術屈其酋而厚犒之  
迄不爲害尋擢湖廣副使時嚴嵩方用事遂乞休歸  
子弘宇弘憲俱知名

黃弘宇 附弟弘憲

黃弘宇字震祥少受學於霍尚書韜年十七舉順天  
鄉試慨然有志大業以世俗一切榮利爲恥嘉靖己  
未登進士授戶部主事督運昌密陳五難三便監兌  
南都復以水災備陳損上益下用一緩二之義得請



民困獲甦出守武昌作政約諭僚屬一意廉靖楚藩  
以爭餽黃金百兩不受景王歸葬使人以禮諭中官  
復下令曰護軍敢譁吾境者執之既過卒無敢譁者  
凡興利釐弊恤獄賑饑具有聲入覲首舉卓異賜宴  
旌之尋擢四川副使浙江叅政以憂歸服闋 陛見  
失儀致仕弟弘憲舉于鄉爲南康令著古制以自檢  
約建六議以正民風懸鉦告姦設匭禱弊稱能吏焉  
禽巨寇葉楷以功加五品俸服未幾以憂歸起蒲懷  
集捕魚崗鹿馬諸寇有功撫按交薦未幾卒

肇慶府

梁敏

梁敏字以納高要縣人性孝友穎悟能文年十九舉  
洪武壬子鄉試歷清遠教諭繁昌宛平丞以文學薦  
擢左春坊左贊善日隆眷遇嘗被命作午門觀燈詩  
及賦朝陽鳴鳳圖操筆立就成祖稱賞不已尋以  
乞休忤旨謫遼陽苑牧再陳再謫松江訓導疏累  
上始賜允復其官致仕歸中年喪偶不再娶自奉  
如寒儒以勤儉訓諸子多所著詠年九十有六卒有  
雲萍集

梁軫

梁軫高要縣人少卓立有經世志永樂中鄉薦授福建道監察御史肅清風紀務持大體改行在山西道巡按直隸所至激烈有指揮抵法託鄉人蘇都事餽金硯一夜明珠五叱之出按湖廣清臬司匿賊賊劾武臣不法事後爲忌者所中謫雲南典史謝事家居布衣蔬食始終剛介蓋古之遺直者

陳鼎

陳鼎字重器新興人永樂乙未進士吏部尚書蹇義知其學行薦擢山西道監察御史立朝正直不詭隨

於時俗宣德初出知建昌府時民多桀驁鼎至真最  
強者十餘于法始知畏懾復布教條施德意而郡內  
大治荆府內豎蕭詔檀作威福鼎以上聞寘之法於  
是官校之屬斂衽畏避四境晏然十年以政績陞都  
察院右僉都御史勵志剛決風紀益振左右都御史  
缺人與僉都王翱等正己率物各道敬服正統元年  
陞刑部左侍郎與尚書魏源相得留心刑獄務崇矜  
恤三年卒于官賜葬祭

梁致育

梁致育字遂初高要人通五經志行高潔以鄉薦歷

建昌訓導六典文衡致仕家居嘗修郡志天順二年  
流賊掠蓮塘致育年九十六日瞽被執賊令講書厲  
聲罵曰蠻奴若曉禮義必不爲此賊不忍害以竹輿  
舁之行致育知不免語舁者曰至徑口深淵卽白我  
遂投淵死賊驚嘆而去有竹屏稿藏于家子穉應浙  
江鄉薦穉子瑜瑜子鏞皆舉于鄉瑜知來賓遠安二  
縣有政聲鏞廉靜剛方篤于人倫仕至鎮江府同知  
與時不協致仕歸行李蕭然家居屏跡不謁公府太  
守袁載鄉射東序以賓禮賓之躬迎不往月旦評其  
家世清白云

劉芳附子竑

劉芳字永錫陽江人敏穎好學登成化戊戌進士授江西靖安知縣清介公勤時邑久頽敝芳至一新之建公署興學校修壇壝治績煥然民有余紹祖者寃繫犴獄得其狀卽釋之政暇與生徒講學使胥相勸勉士類興起居六載政平訟理召爲戶部主事士民立去思碑于學而紹祖刻像事焉轉郎中出知南寧府以節用愛民爲本至忤上官不顧久淹于職乃引疾歸至今郡民猶思慕之子竑字伯度弘治乙丑進士授如臯令遷駕部主事轉光祿寺丞豁達廉潔年

未衰而乞休屢檄不起人稱勇退其應鄉書名次連取甲科肖其父云靖安南寧皆祀芳于名宦祠

盧宅仁

盧宅仁字伯居四會人登弘治己未進士授都水主事管濟寧閘河議修仲家淺諸閘咸底績時逆瑾擅權有所需同列曲徇宅仁獨不應幾蹈于禍瑾敗獲免歷雲南副使以邊功受賞轉福建按察使能決冤獄丁內艱服除補廣西復以父喪去時已有雲南右轄之命矣終喪守令勸駕宅仁嘆曰人臣之義終事而退且仕以養親今二親俱違養矣出復何爲竟不

起得請致仕居鄉恂恂鄰有犯者以理論之不悛則閉門弗校嘗修邑志寬嚴有體其著詠亦富時稱其爲博雅君子

莫如士

莫如士字子元恩平人以龍驤衛籍領順天鄉薦登嘉靖丁未進士第歷官監察御史性端直敢言嘗竒張岳翁萬達有用世才遂疏薦之後俱以功業顯時咸寧侯仇鸞通虜將爲不利如士劾其不臣鸞甚銜之欲中以危禍會鸞病卒獲免如士又偕臺省諸臣追論鸞通虜之罪上震怒命發鸞棺暴屍梟首傳



示九邊是時直聲動海內遷大理丞理冤決滯人以爲有子公風焉從兄如爵甲辰進士弟如善庚戌進士皆監察御史而如善歷官按察使亦有時名

李津

李津字濟之四會人苦志勵行登弘治壬戌進士知寧海州興廢補弊時劇賊劉七流劫本境津先備夜遣卒四出張疑兵以懼之賊遂引去擢南京刑部員外郎晉郎中歷守南寧鄖陽興學採荒俱有成績遷兩淮都轉運使時鹽筴叢委奸蠹根據津至按剔釐正一裁以法國課倍昔而羨餘悉歸於公乃爲權貴

所忌罷歸南海吳允禎繼其任亦以廉介稱每自誦  
曰得無愧於吾鄉濟之否其爲人所敬服如此生平  
淡薄片楮不抵公門年七十卒時稱其清介云

南雄府

陳德文

陳德文一名瑩中字文石南雄府保昌縣人洪武中舉文學授台州府通判越二年左遷枝江令又遷縉雲監稅所至有稱以兵部尚書唐鐸薦拜北平道監察御史明年擢按察使三十年使西番撒馬兒罕等國開通西域居十有二年克舉使職不辱君命永樂五年回京凡所歷之國采訪風俗作爲詩歌歸日進呈成祖嘉之擢僉都御史詔內閣修西域志多採其言八年二月隨駕征迤北十月迤北平上念

久勞王事進右都御史賜衣十襲名馬二匹及校尉四名還鄉省墓九年六月復詔回京十三年三月卒于位進左都御史階諭賜葬祭

譚大初

譚大初字宗元始興人宋朝散大夫煥之後生而穎異十歲爲郡諸生督學魏校深竒之嘉靖丁酉應貢復領鄉書以貢資還公帑或以爲矯止之大初曰受此自心不慊豈矯乎連登進士出跨蹇驢人笑之弗顧也以憂歸修郡志公而核士林多之赴選授工部主事痛革積弊不遺餘力久之復以憂去起補戶部

選爲戶科給事中歷兵刑左右給事奉使冊封淮藩  
餽遺一無所受秩滿擢江西按察副使獨振風紀視  
權勢藐如也清戎多所開豁御史孫慎以失額爲疑  
大初曰失額罪小殃民罪大慎從之理驛傳嚴革冒  
濫撫院或借資庇其故人亦峻拒焉過者多避道而  
去民有枉抑必直之時嚴嵩專柄其親黨屢奪人產  
有司莫敢問大初廉得其實悉麗于法嵩滋不悅秩  
滿年僅五十具疏乞休疏甫至擢廣西叅政不得已  
就職值桂林澇米價騰湧請督府開倉發糴便宜賑  
恤存活十餘萬粵右賴之在事二年值妻子連喪悲

哀疾作遂上疏乞解職不待報而行歸築拙逸軒讀書其中時或鼓琴一曲陶然而樂無復仕進意嘉靖丙寅召用耆碩起家河南右叅政連擢南京右通政應天府尹三奉 詔書不敢復辭 穆宗卽位疏乞以叅政致仕不許晉工部侍郎遷戶部左侍郎總督倉場貴戚權璫侵民田土必躬覈之所侵悉歸之民力薦僉都御史海瑞可當大任累乞休不許轉南京戶部尚書道出淮陰復引疾乞休復以尚書致仕歸家田不滿百畝深居簡出人罕見其面卒年七十五有司以聞 詔賜祭葬所著有次川存稿人卷族譜

五卷遺戒子孫勿請卹典勿求墓表論者謂其涅不能緇寵不能榮進以三讓退以一辭庶幾古人臣風云子音以貢歷上石西州知州所在著惠政有廉介聲孫學顏廕國子生

韶州府

黃裳

黃裳字元吉其先家興國洪武中祖仲禮以事戍曲江裳讀書過目成誦登正統壬戌進士授監察御史一時彈文多出其手法司會審疑獄俄頃辨折多得其情都御史陳鑑雅重之嘗按兩浙鹽法及蘇常諸都所至有實惠已巳虜犯邊扈從北征没于土木明年加恩死事者詔恤其家

鄧頤

鄧頤樂昌人正德間進士授廣信永豐令時閩寇犯



境顛伏兵大破之斬獲甚衆寇悉衆突至顛力戰被  
害事聞贈光祿少卿謚忠毅

廉州府

林榮

林榮合浦人成化戊戌進士任禮科給事中抗直敢言不避權貴時各省運糧入京中官多橫暴侵刻榮疏論之其弊始革後滿喇咖國請封以榮充正使泛海溺死詔贈禮科都給事中遣官諭祭廕其一子祀鄉賢

高州府

姚岳祥

姚岳祥字子定化州人登萬曆丁丑進士選翰林庶  
吉士時張居正柄政聞制不守鄒元標抗疏摘其罪  
下獄居正命吏守獄門凡來詢元標者書名以報卽  
親屬重足不至岳祥獨昂然直入吏書其名神色自  
若旣而嘆曰奸邪當國尚可行吾志耶遂養病歸